

Blair, Ahern eta Clintonek aurrera egiteko adorea eskatu diete ipar irlandarrei

Rosemary Nelsonen hilketaren ondorioz sortutako istiluak errepikatu ziren atzo Portadownen

Agentziak / Londres

Erresuma Batuko eta Irlandako lehen ministroek —Tony Blair eta Bertie Ahern— eta Bill Clinton presidente estatu batuarak agiri bat kaleratu dute elkarrekin, ipar irlandarrei bake negoziatzioetan aurrera egiteko adorea eskatuz. Hiru agintariek «oso urrun heldu gara atzera egiteko» esan dute. Agiriak agiri, giro liskartsua berriro errepikatu zen ostegun goizaldean Portadownen.

AGIRIA irlandarren jaieguna ospatu ostean —San Patrizio— eman zuten jakitera Erresuma Batuko, Irlandako eta EEBBeko agintariek. Udazkenaz geroztik aurrerapenik apenas izan duen bake prozesuaren blokeoa gainditzeko deia egiten dute, desarmeak eragindako geldiuena «adorearekin» gainditzeko eskatuz. Hiru agintariek euren ardura azaltzen dute egungo egoeratik. Elkarrekin kaleratutako agiria «Erresuma Batuko, Irlandako eta EEBBeko Ipar Irlandako gatazka konpontzeko dugun desioaren isla da», sinatzaileen arabera.

«Aurrerapen garrantzitsuegiak lortu ditugu, bat-batean atzera egiten hasteko. Ostiral Santua heldu bitartean guztiok dugun zeregina bete behar dugu» dio agiriak. Ostiral Santuan —apirilak 2— amaitzen da Erresuma Batuko Gobernuak desarmearen aferan akordioa lortzeko emandako azken epea.



PAUL FAITH / AP

Ostegun gau eta goizaldean Portadown hirian gertatutako istilu larrien irudia.

Desarme hori noiz hasi behar den, oster, ez da zehazten akordioan.

Blair, Ahern eta Clintonek sinatu agirian lorpen aipagarriak lortu direla azpimarratu zuten, zigor osoa bete ez duten preso askapena kasu. «Oraindik, hala ere, egiteko handia dugu», dio agiriak. Esaterako, «Omagheko sarraskia edo aste honetako bi hilketak eta horiek ondoren eragindako istiluak».

Irlandako lehen ministro Bertie Ahernek agirian esandakoa baieztatu zuen Irlandako Irratian egin adierazpenean: «Desarmerako baldintzak jakinak dira; bada garaia aurrerapausoren bat lortzeko».

Ipar Irlandako lehen ministro David Trimblentzat, nahitaezkoa da IRAk armak uztea Sinn Fein Ipar Irlandako Gobernuan egoteko, nahiz eta talde paramilitar loialistek oraindik armak dituztela agerian geratu asteen.

Blair, elkarrizketetan parte hartzeko prest

Tony Blair lehen ministro britainiarra prest agertu da bake prozesua berpiztuko luketen elkarrizketetan parte hartzeko. Downing Street egoitzako bozeramaile batek «ahal dena, onura ekarriko duen behar adina egiteko prest da», adierazi zuen.

Elkarrizketa giroa, hala ere, nahikoa urrun dagoela azpimarra daiteke Rosemary Nelson abokatuaren eta Frankie Curry buruzagi paramilitar ohiaren hilketen ostean. Herenegun egin zen abokatuaren hileta elizkizuna Ipar Irlandako Lurgam herrian. Hileta elizkizunak amaitzean azken egunetan Portadown hiria astindu duten istilu larriak errepikatu ziren ostegun gau eta goizaldea arte Orange Orde-naren jarraitzaileen eta manifestari nazionalisten artean. Hainbat auto erre ziren protestaldietan. Poliziak liskarrei amaiera emateko egin ahaleginak oro alferrikakoak izan ziren.

Segurtasun neurri bereziak Turkian kurduen biharko Aberri Eguna dela eta

■ **Kurdistango Diyarbakir hiriburura sartzen diren pertsonen kontrol zorrotzak igaro behar dituzte**

Agentziak / Ankara

KURDUEK Newroz ospatuko dute bihar, eta Turkiako Gobernua eraso bortitzen beldur da. Newroz kurduen Aberri Eguna da, eta aurreneki berezia izango da Abdullah Ocalanen bahiketa eta espetxeratzearen ostean. Kurdistango Langileen Alderdiak (PKK) atzo plazaratutako agiriak dioenez, Abdullah Ocalanen askatzea aldarrikatzeko eguna izango da biharkoa: «Gure borrokak eta erristentziak jarraituko dute, Apo—Ocalanen ezizena— aske ikusi arte, herri kurduaren ordezkari legitimo gisa ezagutu arte, eta kurduen arazoa konpondu arte».

Giro hori dela eta, Ankarako Gobernua Turkiako Kurdistanen segurtasun neurri bereziak ezartzea erabaki du. Diyarbakir hiriburuan Newroz ospatzea debekatu du, eta Poliziak kontrol zorrotzak ezarri ditu hiriburuko sarrera guztietan. Aurreko astean atentatuak izan ziren Istanbulgo hainbat auzotan, eta Armadak segurtasun neurriak areagotu ditu.

Newroz, kurduen borrokaren ikur

Kurduen Aberri Eguna aspaldiko ohitura da, eta betidanik ospatu ohi badute ere, 90eko hamarkadaren hasieran oso liskar odoltsuak jazo ziren. 1992an 60 kurdu hil ziren Turkiako Poliziarekin izandako enfrontamenduetan, eta 1995 arte Ankarak debekatu egin zuen ospakizun hori. Orduz geroztik, kurduen borrokaren ikur bihurtu da eguna. Ondoren, 1996an, berriz baimena lortu zuen Aberri Eguna, baina aurtengo egoera «kritikotzat» jo du Turkiako Gobernuak. Ondorioz, Barne ministro turkiarrak polizien librantza guztiak bertan behera utzi ditu, eta denak kontrol lanetan jarri ditu.

Gutxienez 53 hildako Ipar Osetian atentatu batean

■ **Boris Jeltsin Errusiako presidenteak barne ministroa bidali du leherketa gunera ikerketa zuzentzera**

Agentziak / Mosku

LEHERGAI indartsu batek eztanda egin zuen atzo Ipar Osetiako Vladikavkaz hiriburuan. Atentatua goizez egin zuten, azokan, jendez gainezka zegoenean. Hildakoen zenbaketa ofiziala amaitu ez badute ere, gutxienez 53 pertsona hil direla eta ehun baino gehiago zauritu direla esan dute agintariek. Ekintza jazo bezain agudo, Boris Jeltsinek bere barne ministroa bidali zuen Ipar Osetia erre-

publikara ikerketa zuzentzera.

Hilaren 31n Eurokopara sailkatzeko futbol partidua jokatzekoak ziren Errusia eta Andorrako selekzioak, baina egun dagoen egoera liskartsua dela eta, Errusiako Federazioa beste hiriren batean jokatzeko aztertzen ari da.

Errepublikak txiki hau Kaukason dago. Liskar gehienak Inguxetia ondoko errepublikarekin ditu, muga eta lurraldetasun arazoengatik.



AP

Ipar Osetiako sarraskiaren telebista irudia.